




Literatura den Bon Dia

Ernesto E. Rosenstand



COMPANASHI

Cronica di recuerdonan scondi.

Ya ta pa basta tempo cu mi tabata cana cu e idea di skirbi un buki cu lo trata añanan di mi infancia y hubentud den e barío unda cu mi a lanta.

Mi a realisa mi mes cu e tarea ei lo no bai ta facil. Y esaki ta un di e motibonan cu keto bai mi tabata pospone realisa e proyecto aki.

Y poco poco tempo tabata pasa. Y mi no por a keda pospone keto bai. Mi a tuma e curashi y mi mes no sa con mi a cuminsa, ma mi a cuminsa y di e manera ei boso tin e buki aki boso dilanti.

Tempo ta bula cu un velocidad supersonico. Di un manera increibel, ma sigur. Sin cu bo sa tin biaha sin laga nada atras. Otro biaha si, lagando recuerdonan, grato y menos grato.

Bida den su esencia ta sol y sombra. Sin cu bo sa añanan ta pasa bai laga bo cu recuerdonan grato y kisas tambe menos grato, pasobra bida ta sol y sombra, legria awe, tristesa otro dia.. Sucesonan positivo como tambe negativo.

Ma esei no ta nada. Esei mes ta esencia di bida, tur ta haci cu bo ta haya nostalgia pa e añanan cu bo a laga atras y cu bo a kere cu nan tabata miho cu esunnan den cua bo ta bibando aden, o kisas esunan cu a bai laga bo sin cu bo tabatin e minimo nocion.

No kere cu nan lo bai keda warda bo. Y di pio ta cu bo no por bai bek den tempo. Pasobra tempo no ta para warda bo. Maske bo kier, bo no por tene den bo mannan. Maske no ta tur ora lo bo a desea pa para tempo.

Bai e ta bai sin mira atras. Lagando solamente recuerdonan cu un pa dos por bin halto y pone bo rebiba e oranan dushi cu a pasa bai sin cu bo tabata sa. Y sin tene cuenta cu nada. Esei ta su forsa.

Y di e manera ei e ta yuda forma un bida den tur sentido di palabra. Loke por keda ta deseo pa por bai bek. Pa sinti nostalgia. Pa rebiba e momentonan agradabel cu a pasa bai laga bo. Resultado ta recuerdo y mas recuerdo.

Algun asina cla, otronan scondi, ma en todo caso tur a yuda forma e bida cu bo ta hibando den actualidad. Nada mas! Asina mes nan ta asina bunita cu bal la pena pa rebiba nan.

Y t'esei mes tabata pasando awor aki dor di mi mente.

Busca manera di rebiba recuerdonan di añanan cu a pasa lagando rastronan atras. Algun

asina cla, otronan menos. Y tin cu te asta a desaparece pa semper. Tur esaki ta depende di kico bo a experiencia den curso di tempo. Bida no ta bai riba un cminda di rosa. Hopi biaha riba camindanan hopi raro.

Laga mi purba rebiba e pasado ei cu parce cu ta keda asina leu, ma en realidad e ta ei mes. Sperando pa algo por rebib'e. Tin biaha algo insignificante ta percura pa esei.

Tabata na cuminsamento di decada di añanan cuarenta, pa ta mas exacto na aña 1941, cu nos a bin biba na Companashi.

Añanan scur den historia di humanidad. Mundo tabata experienciando un guera teribel na e continente Europeo. Y ta den e periodo aki nos a bai biba na e barío aki.

Un barío e temponan ei poco conoci. No mucho grandi di mucho importante. Un barío poco p'afo di Playa. No di e grandi ei. E no tabata mucho conoci e temponan ei tampoco.

Den curso di añanan el a bira pa nos mas cu un barío. E temponan ei e tabata un barío masha chikito mes. Dies cas pa suit di veld di R.C.A. bieu y canto di caminda cu tabata bai Tanki Leendert 4 a 5 cas di tabla. Y p'abou di esakinan tambe varios cas cu tabata yega te na e caminda cu tabata bai nort.

Masha poco trafico den e caya aki. Na Aruba mes e temponan ei tabatin masha poco auto. Pues na prome bista nada di gaba. Manera e tin masha hopi na nos isla.

E caminda aki no tabata asfalta. Un caminda di santo no di e malo ei. E tempo ei basta auto tabata pasa riba dje. Mester admiti cu no tabatin e cantidad cu tin awendia.

Y cada banda di dje trankeranan di cadushi cu ora ta temporada tabata pari dadelnan cu nos tabata sali busca ora no tabatin nada di haci. Loke mas tanto tabata sosode temporada cu nan tabata hecho.

La Salle College manera e ta awo no tabata sisti. E tabata un laga habri. Ei nos tabata sa hunga de bes en cuando. Nos luga preferi pa hunga tabata un veld chikito cu tabatin pa suit di e cunucu.

Aki nos tabata hunga softball y/o bomba. Futbol masha poco. Ei tabatin un veld grandi unda cu nos tabata sa hunga hopi.

E luga di Trupialen si tabat'ei. Ei banda di frere tabata train,, Aki tambe tabata tene reunion un biaha pa siman di e organizacion di mucha catolico: Sintt Thomas Bond.

E blokhut di e verkenernan tambe tabata ei banda, mas pariba. E temponan ei tabatin basta interes pa verkennerij. E tabata un movimiento hubenil hopi popular.

Anto p'abou di e cunucu tabatin tambe algun cas. No di e tanto manera awendia ta e caso. Den hopi di e casnan aki tabatin famianan macamba tabata biba. Mas despues ei banda a yena cu cas.